

劉

氏

鴻

書

第九十四卷

錄異部一

祥徵

黃爵赤頭

受命於天

盟津

卯金刀

天璽

三餘

夢墜牀下

雌雞爲雄

瓦礫不絕

女主

白龍飲池

鏡中影語

樓閣之狀

母后相

郭雀兒

箸立

棋卜

梟鳴

宋捷

太平四字

上上一畫

朱公善人

編素攀髯

卷九十四

劉氏鴻書卷之九十四

明、宣城劉仲達纂輯

錄異部乙

太史湯賓尹刪正

祥徵

黃帝將興有黃龍赤頭立於日傍帝曰黃者土精赤者  
火榮爵者賞也余將立大功乎

春秋異郵

禹娶塗山謂之女嬌取辛壬癸甲禹行十月女嬌生子  
啓啓生不見父晝夕呱呱啼泣禹行使太章步東西暨  
亥度南北暢八極之廣旋天地之數禹濟江南省水理  
黃龍負舟舟中人怖駭禹啞然笑曰我受命於天竭力

以勞萬民生性也。次命也。爾何爲者。顏色不變。謂舟人曰。此天所以爲我用。龍乃曳尾舍舟去。

吳越春秋

武王伐紂。升舟陽侯波起。疾風疾流。武王操黃鉞而麾之。風波畢除。中流白魚入於舟。燭以告天。與八百諸侯咸同此盟。尚書所謂不謀同辭也。故曰孟津亦曰盟津。

論衡

孔子夢三槐。間豐沛市有赤飈。起呼顏回。子夏往觀之。見赤蛇化爲黃金。上有文曰卯金刀。後高祖起豐沛。

金樓

漢元后在家嘗有白鸞。啣白石大如指。墜后積篋中。后

取之石自剖爲二其中有文曰母天地后乃合之遂復還合乃寶錄焉後爲皇后常并置璽笥中謂爲天璽也

西京雜記

梁武帝時童謠云王氣在三餘乃於餘千餘姚餘杭爲厭勝之法時長興有餘干山餘甌水餘魚浦而陳武帝實生其處

鉛槧

唐高宗將舉義師西入長安夜夢忽身歿墜于床下爲羣蛆所食及覺甚惡之乃詣智滿禪師密語之滿賀曰公得天下矣帝大驚曰何謂也滿曰人臣不敢直指天子故曰陛下歿是歿也墜床是下也蛆趨附也羣蛆共

所食者是億兆趨附至尊之象也甚吉貧道爲沙彌日  
嘗工易再爲公占之卦成得乾飛龍在天又是帝王之  
徵帝至霍邑夢甲馬無數飛滿空中帝問是何軍伍對  
曰是公身中之神也若無此何以威制天下言訖並飛  
入帝身帝覺召太宗言之曰吾事濟矣太宗拜於前連  
呼萬歲者數四帝復大悅其後卽位卽命復營其寺賜  
額爲興義寺以太原帝舊宅產業並賜之永充常住今  
寺內圓夢堂及塑師像並在

洛中紀異

唐高宗時天下諸州進雌雞變爲雄者甚多或半已化  
半未化乃則天正位之兆唐人目則天之世曰牝朝后

初稱周方具告天冊文有吏人見大周字上有兩仙童長二三寸執刀剗削斯須視之失去周字人以知唐必

復興

山堂肆考

鄭絀相公宅在招國坊南門忽有物捉瓦礫五六夜不絕乃移於安仁西門宅避之瓦礫又隨而至經久復歸招國鄭公歸心釋門禪室方丈及歸將入丈室蟾子滿室懸絲去地一二尺不知其數其夕瓦礫亦絕翌日拜相

酉陽雜俎

唐太宗之代有秘記云唐三世之後有女主武王代有天下太宗密召李淳風以詢其事淳風對曰臣據玄象



推美其兆已成然其人已生在陛下宮內從今不踰四  
十年當有天下誅殺唐氏子孫殲將殲盡帝曰求而殺  
之何如淳風曰天之所命不可廢也王者不死雖求恐  
不可得且據占已成復在宮內已是陛下眷屬四十年  
又當衰老老則仁慈其於陛下子孫或不甚損今若殺  
之卽當復生更四十年亦堪御天下矣少壯嚴毒殺之  
爲血讐卽陛下子孫無遺類矣太宗乃止

談賓錄

唐太宗未建義時常飲酒晝臥劉文靜坐樓上見宅南  
大池中有白龍下飲水池中大魚皆躍上岸以百數良  
久乃隱家人共見極驚駭太宗睡覺謂文靜云醉中潛

甚夢入公家池中飲水極清冷快意文靜視其體猶濕也

寓簡

唐中宗爲天后廢於房州仰天而歎因抱一石於雲中心祝曰我爲帝此石卽不落遂爲樹枝閣之至今猶存又有人渡拾薪得一古鏡進之中宗照面其影中有人語曰卽作天子未浹旬踐居帝位

獨異志

肅宗初爲皇太子天寶十三載觀安祿山有悖逆之狀恐危宗廟遂精神祈夢其夜夢故內侍普寂等二人昇一案覆以黃帕自天而下直至帝前素版丹書文字甚多旣寤所記者惟四句曰厥不云乎惟祺惟時上天所

保福祿不虧十五六載玄宗幸蜀留上在後宜諭百姓  
賊追至渭北便橋已斷水瀑漲無舟楫上號令水濱百  
姓歸者三千餘人渭水可涉又遇潼關散卒誤以爲賊  
與之戰士衆多傷乃收其餘衆北上軍旣濟其後皆溺  
上喜以爲天之佑時從上惟廣平建寧二王及四軍將  
士纔二千人自奉天而北夕次永壽百姓遮道獻牛酒  
有白雲起西北長數丈如樓閣之狀議者以爲天子之  
氣自是紫雲擁帝所乘馬聚散不時至平涼郡路傍遇  
一伏兔命左右索弓箭因謁左右曰吾若破賊射則中  
之不然則否一發而斃左右咸稱萬歲上初發平涼有

彩雲浮空白鶴前引出軍之後有黃龍自上所憇屋騰  
空而去上行至豐寧南見黃河天塹之固欲整軍北渡  
以保豐寧忽大風飛沙跬步之間不辨人物及迴軍趨  
靈武風沙頓止天地廓清於後彭原郡受冊太上皇下  
詔曰間者日抱載赤雀白狼之瑞接武薦臻此皆黃帝  
聖敬之符孝友之感也

冊府元龜

郭祖受命討守真駐師河中城下逾年望氣者言守真  
必破城下有三天子氣謂郭祖柴世宗太祖也守真猶  
豫不決使術者視家人至子婦符氏術者大咤曰母后  
相也守真曰吾婦乃爾吾可知矣遂決旣嬰城無砲材

頗患之居一日河水自上浮木千百皆砲材也守真大喜以爲受命之符其後既破郭祖以符氏納世宗是爲符后

畫後錄

郭祖微時與馮暉同里閭相善也椎埋無賴靡所不至旣而各竄赤籍一日有道士見之問其能曰吾業雕刻二人因令刺之郭於頸項右作雀左作穀粟馮以臍作甕甕中作鴈數隻戒曰爾曹各于頸項自愛汝之雀銜穀汝之鴈出甕乃亨顯之時一日寒食馮之婦得麻鞋數緡燕之將以作節馮得之滿搏醉歸臥門外其婦勃蹊曰節到也如何辦得馮徐捫腹曰休說辦不辦且看

雍裏飛出鴈郭祖秉施之後雀穀稍近登位之後遂啣穀馮秉施鴈自甕中累累而出世號郭威爲郭雀兒

錄

世宗在民間嘗與商頡跌販貨至江陵有卜者王處士世宗往問焉方布卦忽有一著躍出卓然立卜者大驚曰吾家筮法十餘世矣嘗記曾祖以來遺言凡卜筮而著自躍出者其人貴不可言况又卓立不倒得非爲天下之主乎遽起再拜世宗雖佯爲詰責而私心甚喜

史補

五代

顯仁后在壯地未知高宗卽位嘗用象戲局子裹以黃

羅書康王字貼於將上焚香禱曰令三十二子俱擲於局若康王字入九宮必得天位一擲其將子果入九宮他子皆不近后喜甚卽奏徽廟大喜復謂后曰瑞卜昭應異常可無慮

揮塵錄

常顓舉進士時貧窶甚有韋光者待以宗黨輟所居外舍館之放榜之日風雪寒江報光成名絡繹而顓畧無音耗方擁爐愁嘆忽有鳴梟來集環牖繫上顓逐而復還謂僕曰我失意無所恨兼恐更罹災患及禁鼓鳴榜至顓已登第然則鵬止梟鳴果不祥乎

朝野僉載

○鄙

陽龔紀與族人同應進士舉唱名日其家衆妖競作北

雞或晨鳴犬或巾幘而行鼠或白晝群出至於器皿服用之物悉自變易其常處家人驚懼召巫治之時尚寒巫問爐坐有一猫臥其側家人謂巫曰吾家百物皆爲異不爲異者獨此猫爾於是猫人立拱手言曰不敢巫大駭而出後數日捷音至二子皆高第乃知妖異未必盡爲人禍

續墨客揮犀

馬燧討李懷光夜宿一村問田父此何村也曰名壞懷村燧大喜曰吾誅懷光必矣澶淵之役亦以宋捷爲吉兆岳飛討楊么時么歸洞庭出沒不可測偶獲一諜者問其巢穴三軍大喜迄平之蓋用兵行師但得吉兆亦



足以壯三軍之氣重耳出奔乞食于野人野人與之塊而子犯乃曰天賜也却說從吉兆上去蓋以堅從亡者之心如狐鳴魚書之類至詐爲吉兆以動衆若老嫗赤帝之稱芒碭雲氣之瑞昭灼如此安得使豪傑之不景從乎

鶴林玉露

元至正壬辰間江淮蘆荻多爲旗鎗人馬之狀節間折開有紅暈成天下太平四字

草木子

元至正君哀政亂劉福通徐真等以妖術聚衆紅巾爲號天下大亂有司莫敢誰何我太祖尚潛草野禱諸石固神曰元德旣衰九土糜沸生民之塗炭極矣吾欲

倡義以拯衆與之否乎訣云英雄豪傑自天生也須步  
步循規矩於是歸鄉里收殘民數百屯於滁陽忽有義  
兵來歸者三千率練之明年起兵自和州渡江取太平  
路遇一術士上問曰天下擾擾紛紛屬之誰與士曰願  
書字覘之上卽掣刀畫一字於地下士俯伏拜曰土上  
一畫臣獨知爲王也上六月斬紅巾諸盜又明年春圍  
集慶路與元兵大戰三月而元兵解去夏五月堅守江  
左見驛中有七歲兒居其中上問之對曰臣故父當此  
役今臣代父耳上曰善對乎曰然上曰七歲兒童當馬  
驛兒卽對云萬年天子坐龍廷上大嘉蠲其役大奮天

縱之勇後三年集兵十萬又三年集精兵七十餘萬一  
戰而取荆襄再戰而取吳粵三戰而閩海悉從四戰而  
席卷全齊所過都邑勢如破竹不數十年奄有天下唯  
僞漢陳友諒未降上率三萬騎大戰於鄱陽湖敵人咸  
見空中數萬甲兵衣絳衣以輔戰幟上書蕭王二字大  
敗其師疑卽漢鄼侯也神讐鬼慄玄兔青海崑崙大漢  
交趾鑠耳之國罔不獻琛是歲戊申建元洪武卽皇帝  
位

說海

我明仁祖先家於泗後徙濠梁所居密邇蘭若與其  
主僧交頗厚僧每欽服仁祖之純誠一夕望其舍火光

燭天爲之嗟惜曰朱公善人天恐殃之乎彌月而仁祖至僧唁之答曰此夕婦生一男恐有觸汚故久不來踐佛地初無回祿之禍也男卽高皇帝云

庚巳編

弘治十七年蘇城專諸巷有百姓病歿到地府見閻君披籍看之言汝美未盡放令却回其家宮室服用盡如人世但怪王及卒吏皆着縞素私問之人云陽間天子崩故爲戴孝耳百姓得活私爲所親說之越明年五月而至尊厭代○按高安尉辛公平元和末遇陰吏之迎駕者與之俱入寢殿見上升輿甲馬引從而去后數月乃有攀髯之泣今此百姓所見亦隔越半歲其事畧同

耳談

劉氏鴻書卷九十四

終

第九十五卷

錄異部二

變兆

人道邇

山泣

馬生人

造物之巧

手理字

三七世

虎狼入室

巨無霸

牛書

木中字

犬變

黑漢

猪肝

白毛

女道士

鼠食禾

鐵雨

石人

至正屢異

鼠渡江東

江平雷異

黑膏

水僵

王振疊災

地震地裂

千歲猴

庚子屢異

卷九十五目錄終

劉氏鴻書卷之九十五

明 宣城劉仲達 纂輯

太史湯賓尹 刪正

錄異部二

變兆

月犯少微戴逵以已當之憂愁不食而謝敷歿熒惑入  
斗梁武以已當之跣足下殿而魏主奔五星聚箕齊桓  
以霸而祿山以亡星孛大角始皇以帝而項羽以敗虹  
下庭際韋臯拜相而楊勇幽亡故知天道遠人道邇子  
產之言不虛也

文海披沙



桀時泰山山走石泣先儒說桀之將亡泰山三日泣今  
泰山石遠望若人泣者是也武王謂周公曰桀爲不道  
走山泣石

述異記

史記秦孝公二十一年有馬生人昭公二十年牡馬生  
子而死劉向以爲皆馬禍也孝公始用商君攻守之法  
東侵諸侯至於昭王用兵彌烈其象將以兵革抗極成  
功而還自害也牡馬非生類妄生而死猶秦恃力彊得  
天下而還自滅之象也一曰諸畜生非其類子孫必有  
非其姓者至於始皇果呂不韋子京房易傳曰方伯分  
威厥妖牡馬生子亡天子諸侯相伐厥妖馬生人

文獻通考

秦盧生奏錄圖書曰亡秦者胡始皇因大發兵擊胡而  
後來亡秦者乃是胡亥王莽時國師公劉秀名應圖讖  
爲莽所殺而後來恢復者乃是光武魏拓跋珪因神巫  
言欲滅清河一郡而後來殺珪者乃是珪子清河王愛  
妾名萬人隋以李氏當應圖讖族誅李金才而後來代  
隋者乃是李淵父子唐以女主武王之讖誅武衛將軍  
李君羨而後來篡唐者乃是才人武氏數事者天何嘗  
不露先幾而人卒無從測摸故曰雖鞭之長不及馬腹  
甚矣造物者之巧也

白拂齋

王莽始建國二年甄豐子尋坐僞作符命誅黨與死

數百人尋手理有天子字莽解其臂入視之曰此一大子也或一六六也六者戮也明尋父子當戮死也○是歲池陽縣有小人僅長尺餘或乘車馬或步行操萬物大小多相稱車馬及物皆稱人之形三日死

漢武帝太初二年大月氏國貢雙頭雞四足一尾鳴則俱鳴武帝置甘泉故館更以餘雞配之得種類而不能鳴諫者云牝雞無晨惟家之索今乃反顧長安哀鳴故有謠言曰三七末世雞不鳴犬不吠宮中荆棘亂相繼當有九虎爭爲帝至王莽之篡將軍有九虎之號集異志孝靈皇帝董卓專權紹術召難乘輿播越生民塗炭螭

蜴雖除而虎狼入室矣河內婦人食其夫河南丈夫食其婦梁州人生子兩頭京師馬生人

名山藏

王莽其先祖墓梓柱生枝葉上出屋下根垂地中莽蜂目蛇口豺聲頭禿用包巾始謝囂奏浚井得丹書云安漢公莽爲皇帝莽有長人巨無霸身長一丈腰大十圍輜車不能載三馬不能勝能驅諸猛獸虎豹犀象以助威

名山藏

惠帝大安中江夏張騁所乘牛言曰天下亂乘我何之騁懼而還牛又言曰歸何早也尋後牛又人立而行騁使善卜者卦之謂曰天下將有兵亂爲禍非止一家其

年張昌反先畧江夏騁爲將帥於是五州殘亂騁亦族滅京房易傳曰牛能言如其言占爲凶易萌氣樞曰人君不好士走馬被文繡犬狼食人食則有六畜言時天子諸侯不以惠下爲務又其應也

文獻通考

梁開平二年使李思安攻潞州營于壺關伐木爲柵破一大木中朱書文六字曰天十四載石進思安表上之群臣皆賀以爲十四年必有遠夷貢寶者司天少監徐鴻獨謂其所親曰自古無一字爲年號者上天符命豈缺文乎吾以爲丙申之歲當有石氏王此地者天字取四字中兩畫加之於傍則丙字也移四字則外圍以十

貫之卽申字也後至丙申歲晉高祖以石姓起并州如

鴻言

稽神錄

隋大業元年鴈門百姓間犬多去其主羣聚於野形頗  
變如狼而噉噬行人數年而止五行傳曰犬守禦者也  
而今去其主臣下不附之象形變如狼狼色白爲主兵  
之應也其後帝窮兵黷武勞役不息天戒若曰無爲勞  
役守禦之臣將叛而爲害帝不寤遂起長城之役續有  
西域遼東之舉天下怨叛及江都之變並宿衛之臣也

文獻通考

元豐末嘗有物大如席夜見寢殿上而神宗崩至大觀

間漸晝見致和以來大作每得人語聲則出先若裂屋  
摧倒之聲其形僅丈餘彷彿如電金睛行動硜硜有語  
黑氣蒙之不大不了了氣之所及腥血四灑兵刃皆不能  
施又或爲人形亦或爲驢晝夜出無時遇冬則罕見多  
在掖廷宮人所居之地亦嘗及內殿後習以爲常人亦  
不大怖至是浸少時洛陽府畿內忽有物如人或蹲踞  
如犬其色正黑不辨睂目始夜則掠小兒食後白晝入  
人家爲患所至喧然不安謂之黑漢有力者夜持鎗自  
衛亦有託以作過者二年乃息

正史全編

白浦民割猪肝肝中有一紙大如手色如新書云煙蒼

蒼明年無糧次年巢寇起州郡多荒

卷八錄

宋度宗時京師地產白毛如銀絲如馬尾或因地震而生明年帝崩後二年國亡

怪誌

徽宗皇帝撰靈寶黃籙道場科儀頒天下自號道君皇帝宣和殿地陷聖祖像有淚常有哭聲廟磚出血京師大雨七日水高十餘丈男子孕而誕子婦人年四十餘生髯長六七寸疎秀甚美詔度爲女道士狐升御榻坐

名山藏

淳熙五年八月淮東通泰楚高郵黑鼠食禾田無遺穗淮民大饑時江陵府十五里外群鼠以千萬計蔽塞通



達其色黑白青黃相襍與人並行爲車駕所踐死者不可勝計凡三月乃息

文獻通考

至治元年玉案山產小赤犬群吠遍野占云天狗墜地爲赤犬其下有大軍覆境又時雨鐵民舍山石皆穿人物值之多弊謠俗號曰鐵雨

楷記室

元至正庚寅年間叅議賈魯以當承平時無所垂名欲立事功於世首勸脫脫開河址水田又勸造至正交鈔及決河南又勸追求夏禹故道開使泣流身專其任瀕河起集丁夫二十六萬餘人朝廷所降食錢官吏不能盡支河夫多怨韓山童等因袂詐陰鑿石人止開一眼

鑄其背曰石人一隻眼挑動黃河天下反預當開河道  
埋之掘者得之遂相爲驚詫而謀亂山童詐稱宋徽宗  
九世孫僞詔畧曰蘊玉璽於海東取精兵於日本貪極  
江南富誇塞址蓋以宋廣王走崖山丞相陳宜中走倭  
氏此說以動搖天下當時貪者從亂如歸朝廷發師誅  
之雖卽擒獲而亂階成矣有無名子爲詩曰丞相造假  
鈔舍人做强盜賈魯要開河攪得天下鬧  
堯山堂外紀  
至正十五年七月構李城東馬橋上白龍掛烈風怪雨  
閭黑如深夜壞民居百餘所大木盡拔水自半空墮下  
悉折爲二雜以萬瓦亂飛溪水直立人皆叫號奔走不

暇顧妻子龍由馬橋歷城北望大湖而去有聲如萬屋  
齊壓四望黑雲洶湧失府城所在經一二時開霽不一  
年爲戰鬪之地凡龍所過處荆棘寒煙視昔日之繁華  
頓如一夢十七年六月温州有龍鬪於樂清江中颶風  
大作所至有光如毬灰者萬餘人八月祥符縣西北有  
青白二龍見若相鬪之勢良久不散二十三年廣西貴  
州江中有物登岸蛇首四足青色長四尺許軍民聚觀  
殺之二十四年六月保德州有黃龍見咸寧井中二十  
七年皇太子寢殿新甃井成有龍自井出光焰燦人宮  
人震懾皆仆地又宮牆外長慶寺所掌成宗幹兒菜內

大槐樹有龍纏擾其上良久飛去樹皮皆剝七月益都  
臨朐縣有龍見龍山巨石重千斤者浮空而起二十八  
年十月大同路懷仁縣河岸崩有蛇大小相綰結可載  
數車

文獻通考

元至正乙未年中江淮間群鼠擁集如山尾尾相銜度  
江過江東來湖廣群鼠數十萬度洞庭湖望四川而去  
夜行晝伏路皆成蹊不依人行正道皆遵道側其羸弱  
者走不及多道斃

元事始末

元江平路當午天大雷雨有一富家正廳安置匡床胡  
椅圓爐臺卓廳旁一室封鎖如故雷震壁破一孔如盞

大其牀爐椅卓皆從此孔入堆疊滿室人皆不解其異  
次年張九四陷城據有東南五州之地享其富貴十餘  
年蓋小能容巨賤能居貴之象也

草木子

明天順朝黑青見相傳若有物如狸或如犬其行如風  
倏忽無定或侵人面或嚙人手足未幾立太監西廠命  
汪直使偵外事文武大臣多被僇辱或往南京或往北  
邊倏忽不測人以爲黑青之應也

震澤長語

明弘治間陝西慶陽府天雨石子大如鵝卵小如鷄頭  
皆作人言春秋水鬪於穀洛亦已罕矣正德間直隸文  
安縣水忽然僵立高可五丈大亦如之

國朝家範

我明自王振擅權天象災異叠見振狼恣愈甚且諱言  
之時浙江紹興山移於平地地動白毛徧生又陝西二  
處山崩壓没人家數十戶一處山移有聲叫三日移數  
里又黃河改流東注於海湔没人家千餘又振宅新起  
內府乾方未踰時一火而盡又南京殿宇亦一時被焚  
是夜大雨明日殿基上生荆棘二尺高始下詔赦盜不  
可遏蝗不可滅天意不可回胡寇乘機大舉犯闕矣

日錄

弘治辛酉十月七日三鼓殘熟睡間初覺牀兀箱篋颯  
颯有聲後復大震人則數起數仆亦有稱盜而悞傷者

孔多既久始知其爲地震也又云成化乙未夏四月地震無若是甚最後劉賊猖熾天下騷擾其大半繼以疫

厲饑荒數年方寧

說海

又陝西西安延安慶陽潼關等

處地震有聲朝城縣地震尤甚聲響如雷震倒官民房  
屋五千餘間壓歿男婦一百七十自朔至望震尚未息  
不時動搖縣東安昌八里徧地竅眼湧水有震開裂縫  
長一二丈或四五丈者湧出溢流如河

通紀續

寧德陳騶山棗初舉孝廉赴南宮試道過德州有怪猴  
專憑村婦爲言人未來事無弗驗陳聞而造焉方入門  
怪卽喜曰寧德陳騶山來也因語婦家陳君遠道相從

無以爲供可速取楓亭荔支來須臾而荔支至食之不  
異閩產時蓋十二月也臨行謂曰公明春登第仕至江  
西巡按赴任之日幸取道過我有小事欲相煩耳及直  
指命下陳復往訪之怪曰某雖妖邪然能預知禍福使  
人識趨避未必非有利於世者但居此中久山神土主  
遑遑相侵吾甚患之若得張真人玉印一道可保無虞  
矣遂出白綾帕一方陳曰此固不難吾當力任及至府  
中真人一見謂曰使君正人何爲妖氣甚盛若此陳曰  
某所以來者老母晚年暮夜輒生驚恐欲求玉印以驅  
邪耳所云妖氣得無拒人已甚乎因出帕于袖中真人



持帕笑曰使君幸無相誑此豈大夫人物邪廼千歲老  
猴皮耳此畜神通廣大得吾玉印卽上帝亦無如之何  
吾將治之陳廼以寢告因爲之祈免再三真人曰使君  
第坐不久當來矣頃之見一老猴自縛於墀下大呼曰  
騶山之我呼未竟忽霹靂一聲遂震歿焉

閩海異聞

萬曆庚子夏四月二十三日淄川縣大風雨雹城堞剝  
落二百餘丈磚石皆在城上無漂搖城下者城隍廟樹  
六七圍者二十餘株盡拔折東壁有榦木丈餘繁一飛  
瓦若累丸不墜城中坊石傾頽殆盡人壓歿無筭巨石  
鐵檻碎如齏粉獨高氏坊下萊傭聞風中人語甚急曰

不可動不可動兩坊夾持左右俱衝毀此坊居中獨存  
坊柱先日開裂次日復合官民廬舍發揚一空有王氏  
屋三間自西院移置東院門窓戶牖衣服筆記宛然如  
初南街國氏巷屋脊上有卓一張平欹上面鋪敕布列  
盃中酒滿不溢物色之乃近地人家筵客物也客因厭  
尚在某家未去街民某家有十二甕飄去不知所之次  
日行人從黃姑庵得其中盛米蔬如故無顛破文學  
某生有紅紗一疋緘束筒內上有封識手號飄至空中  
儼然某生紗也而厨筒米簋如昨離城十餘里高梁三  
庄屋盡毀風後見樹上棚簾一盆觸而墜地不破盆幽

咽如啼聲踰刻乃止離城十五里有土地祠祠前有古  
樹不知幾百年霹去半身剩一枯枝上有鷹巢未毀并  
雛鷹四是日悉飛去樵者晨起入山望見滿山長人伏  
石下熟視良久風動則着帽披衣者皆樹也城中人衣  
履吹去者多自此間得是日先大雨雹如馬蹄如杵婦  
男爭戴笠取視俄而晦冥天地不辨屋瓦上如車輪聲  
行人傍巖曲望見雲中巨人手指一節丈餘徃來忙擾  
上下身首俱不見或見雲初起處有人捧長牒展兩足  
踏兩獸背上坐兩小兒持鞭疾擊獸獸搖拽不前良久  
旣而入城爲風或見紅綠衣人持短兵格鬪或見長繩

千尺翻轉絡繹傳語畧同實古今未有之變也

居東集

劉氏鴻書卷九十五

終

錄異部二

人異

寸人

大耳人

僵人

神母

安登

有莘氏

六子十六男

生桑化石

鬼方女

星娘

娘生卵

產十子

雙產

郊育

毛民

冤家同生

壽聯

假天子

屍鬪

諸葛龜

發昭陵

高麗船

無頭人

盜賊三朝改元

脫身

道士呪尸

妖人王臣

魘魅行姦

變鬼法

虎四虎五

丙丁不靖

卷九十六目錄終

劉氏鴻書卷之九十六

明 宣城劉仲達 纂輯

錄異部

太史湯賓尹 刪正

人異

西北荒中有小人焉長一寸圓如長朱衣玄冠乘輶車  
導引有威儀人遇其乘車並食之其味辛楚終不爲虫  
象所咋並識萬物名字殺腹中三虫

神異經

有大耳國其人寢常以一耳爲席一耳爲衾

山海經

僵

人峽路側巖上有死人僵尸巒穴故岫壑取名焉釋鞍  
就穴直上可百餘仞石路透迤劣通單步僵尸倚窟枯

骨尚全唯無膚髮而已訪其川居之士云其鄉中父老作兒童時已聞其長舊傳此當是數百年骸矣

水經註

伏羲氏之母曰神母居於華胥之神洲履巨人跡意有所動青虹繞之久而方滅卽覺有娠歷十二年而生伏羲長頭修目龜齒龍唇眉有白毫鬚垂委地人曰歲星下臨以歲十二年一周天也

拾遺記

炎帝神農氏出少典國君之後母曰安登生帝於姜水三辰能言五日能行七朝而齒具

野史

昔有莘氏女采桑於伊川得嬰兒於空桑中言其母孕於伊水之濱夢神告之曰白水出而東走母明視而見



白水出焉告其鄰居而走顧望其邑咸爲水矣其母化爲空桑子在其中莘女取而獻之命養於庖長有賢德殷以爲尹曰伊尹

水經註

顓頊裔孫陸終娶嬪氏孕之三年一產六子曰樊曰惠連曰箴曰萊曰安曰季連○北魏延興間忻州婦人四產十六男或三男一女或三女一男皆陰氣盛母道壯也

事物紺珠

伊尹無父生於空桑中禹妻化爲石後剖腹而生啓老君耳長七寸在母腹中八十一年剖左脇而生及生髮皓白徐偃王無骨而有聖德劉邕好食人瘡痂文王

四乳皐陶鳥喙堯眉八彩湯臂四肘禹耳三漏離婁察  
見秋毫於十里之外衛臣弘演開胸納懿公之肝周穆  
貴爲天子車轍馬迹遍於天下凡遊行一億一萬里

異志

陸終氏娶鬼方之女孕而不育十一年開其左脇而出  
三人焉又開其右脇而出三人焉長曰昆吾名樊巳姓  
封於衛次曰參胡董姓封於韓周時爲胡國楚滅之三  
曰彭祖名剪彭姓封於韓大彭之墟卽彭城也四曰會  
人妘姓封於鄭五曰安曹姓封於邾六曰季連芊姓其  
後爲楚昆吾氏爲夏伯湯伐桀滅之彭祖氏爲商伯商

之末世始亡

筆叢

田氏寡居夢太白星臨其上因娠歎曰無夫而娠人將棄我移居東方里五月旦生朔因爲氏名朔三日而母死一說朔父張夷字少平

洞冥記

徐君宮人娠而生卵以爲不祥棄之水濱孤獨母有犬名曰鵠倉獵於水側得棄卵啣以來歸獨母以爲異覆煖之遂成兒生時偃故以爲名徐君宮中聞之乃更錄取長而仁智襲君徐國後鵠倉臨死生角而九尾實黃龍也

地理志

牢山有婦人名沙臺居於牢山捕魚水中觸神木若有

感因懷孕產十子後沉木化爲龍出水九子驚走一子不能去背龍而坐龍因挖之其母鳥語謂背爲九謂生爲隆因名爲九隆及諸長兄遂相共推九隆爲王後牢山下有一夫一婦生十女九隆皆以爲妻遂因孽育皆畫身像龍文皆著尾九隆死世世不與中國通

水經註

霍將軍妻一產二子疑所爲兄弟或曰前生爲兄後生爲弟今雖同日亦宜以先生爲兄或曰居上者宜爲兄居下者前生今宜以前生爲弟時霍光聞之曰昔殷王祖甲一產二子曰囂曰良以卯日生囂以巳日生良則以囂爲兄以良爲弟若以在上者爲兄囂亦當爲弟昔

許釐莊公一產二女曰妣曰茂楚大夫唐勒一產二子  
一男一女男曰貞夫女曰瓊華皆以先生爲長近代鄭  
昌皆文長椿並生二男滕公一生二女李黎生一男一  
女並以前生爲長霍氏亦以前生爲兄焉

國憲家猷

晉末嘉中有韓媪者偶拾巨卵歸育之得嬰兒字曰櫟  
方四歲劉淵築平陽城不就募能城者櫟因變爲蛇令  
媪舉灰誌後曰憑灰築城可立就果然淵怪之遂投入  
山穴間露尾數寸忽有泉湧出城池

集異錄

臨海郡東南二千里有毛人在大海州島上爲人短小  
面體盡有毛如猪能穴居無衣服晉末嘉四年吳郡司

鹽都尉戴逢在海邊得一船上有男女四人狀皆如此  
言語不通送詣丞相府未至道死惟有一人在上賜之  
婦生子出入市井漸曉人語自說其所在是毛民也大  
荒經云毛氏食黍者是也

山海經

梁簡文之生誌公謂武帝此子與冤家同年生其年候

景生於鴈門亂梁誅蕭氏略盡

朝野僉載

四月八日謝太后壽崇節九日度宗乾會節賈似道令  
黃蛻致語中一聯云神母聖子萬壽無疆亦萬壽無疆  
昨日今朝一佛出世又一佛出世

三朝野史

唐李峯爲鄧州刺史嘗夜占星宿而坐見東南有異氣

明晨詢之有牧羊胡婦生子笊曰此假天子也座客勸殺之笊曰不可此胡雛他日必於國爲盜占亦有之設殺假恐生真矣乃祿山生于漁陽也

雲溪友議

貞元初河南少尹李則卒未歛有一朱衣人來投刺申弔自稱蘇郎中旣入哀慟尤甚俄頃屍起與之相搏家人子驚走出堂二人閉門毆擊及暮方息孝子乃敢入見二尸共卧床上長短形狀姿貌鬚髯衣服一無差異聚族不能識遂同棺葬之

獨異志

會稽李彭山先生守長沙日有兄弟開田掘土獲一缸竈置鍋水卽沸可炊爨不用柴炭二人爭送府視其內

有一小道士篆丙丁二字於背又有諸葛行軍竈幾字想卽木牛流馬之意云貯府庫尚存

筆談

鄭元素溫韜之甥也自言韜發昭陵從堦道下見宮室制度閎麗不異人間中爲正寢東西廂列石床床上石函中有鐵匣悉藏前世圖書鍾王墨迹紙筆如新韜悉取之韜死元素得之爲多

南唐書

嘉祐中崑山縣上海有一船桅折風飄抵岸船中有三千餘人衣冠如唐人繫紅鞢角帶短皂布衫見人皆慟哭語言不可曉試令書字字亦不可讀行相綴如鴈行久之自出一書示人乃唐祐中告授屯羅島首領陪戎



副尉制又有一書乃是上高麗表亦稱屯羅島皆用漢  
字蓋東夷之臣屬高麗者船中有諸穀唯麻子大如蓮  
的蘇人種之初歲亦如蓮的次年漸小數年後只如中  
國麻子時贊善大夫韓正彥知崑山縣事召其人犒以  
酒食食罷以手捧首而駭意若懽感正彥使人爲其治  
桅桅舊植船木上不可動工人爲之造轉軸教其起倒  
之法其人又喜復捧首而駭

夢溪筆談

紹興二十五年忠翊郎刁端禮隨所親郡運使往江西  
經嚴州淳安道上晚泊旅邸日未暮乃縱步村徑二三  
里入一村舍少憩見主家夫婦春穀問其姓氏曰姓潘

婦淪茗以進聞旁舍窻窻有聲試窺之乃一無頭人織  
草履運手快疾刀大驚愕扣潘生生曰此吾父潘翁也  
宣和庚子歲乃遭幫源方賊之亂斬首死其偶逃外得  
脫還訪尸於積骸中尚可辨認舁以歸手足猶能動肌  
體皆溫不忍斂殯唯造小函寘首埋於屋後而用藥傅  
斷處其後瘡愈別生一竅欲飲食則啾啾然徐灌以粥  
湯故賴以活今三十六年翁已七十矣刀亟反僦邸神  
志恍然不寧者累日後每思之毛髮輒洒洒也

夷堅志

自古盜賊如黃巢僂智高敗績之後皆能脫身自免巢  
髡髮爲僧題詩自贊有鐵衣着盡着僧衣之句智高敗

後惟金龍衣在或謂入海或謂奔大理圖淳熙間江湖  
茶商相挺爲盜推荆南茶駟賴文政爲首文政多智年  
已六十不從曰天子無失德天下無他釁將欲何爲羣  
兇不聽以刀脅之黽勉而從文政知事必不集陰求貌  
類已者一人曰劉四以煎油糍爲業使執役左右辛幼  
安爲江西憲親提死士與之角困屈請降文政先與渠  
魁數人來見約日束兵退旣調其徒曰辛提刑瞻視不  
常必將殺我欲遁去其徒不可則曰寧斷吾首以降死  
先後不過數日耳其徒又不忍乃斬劉四之首使僞爲  
已首以出而文政竟遁去官軍迄不知其首級之僞爲

也鶴林玉露

咸平間議改元中書上三號上曰朕不欲過取美名惟景德之號可議未決因以三號納器中以決疑復得景得字真宗紀仁宗改元天聖時章獻臨朝撰號者取天字

於文爲二人謂天聖者以尊太后也至十年改明道又於文日月並也與二人之義同○又熙寧末神宗改元近臣擬美成豐亨進上指美成曰犬羊帶戈不可指亨字曰爲子不成可去亨而加元遂以元豐紀年塵史

葉宗可元末避地淮楊時寇至積屍滿野葉宗可晝伏夜行至前途度不能行則臥地雜衆尸中至夜分明月

下遙見一人來燭籠前導近而視之一道士一童子執  
燭偕至屍傍道士以燭燭羣屍凡婦人老翁幼稚羸羸  
殘廢者俱手提而擲之輕如一葉俄得一壯男子骸體  
魁碩道士細視有喜色乃卽解衣與之合體相抱持對  
其口呵氣入其中良久道士氣漸微屍冉冉動俄而欠  
伸又開眼遂推道士於地蹶然而起立仍令童子執燭  
前導飄然而去

志怪錄

妖人王臣自幼爲南京公侯府家人數易主亦數易名  
惟妖幻惑取人財所得輒盡累爲主人惡刑所加兩足  
皆不能良行成化初銜術於江陰諸大家皆不納獨周

惟瞻稍待之見其一篋中有二木人長尺餘能自相抵觸坐作進退聽其指揮臣或手取他人之物同棄水中少頃自其袖中出凡人之物經其目者必能暗取其術蓋與王弼略相似後往北京遽攀援得見上歲辛丑上命中官王敬同往採藥於湖湘江右江浙京東諸郡二人者從以無賴二十餘輩專以攫取財物所歷三司郡縣官受其辱民受其擾幾致激變惟江陰諸大家以舊恨最受其毒癸卯至蘇命工鎔銀爲元寶累二千餘錠凡江南之書畫器玩道釋像典之精絕者檢括殆盡二人者本無所識所在奉承之人反教其去取也復以妖

書數十本命府學諸生手抄屢抄不中實欲得賂諸生  
無所出因致罰於校官時在胥門諸生王順輩數十人  
不勝忿恚大肆醜詆適有樵擔至前遂各取一木擁至  
其前將有所加二人者大懼避驛舍中其下人皆被痛  
毆而散自此氣燄少息蘇人得不深受其害二人遂奏  
諸生抗命監司府官救過之不暇且爲諸生甚危惟巡  
撫大司馬王公知而大喜因奏二人不法上遣邏卒往  
捕時大暑卒裸其體遍塗狗血復囊以狗皮以破其術  
至錦衣獄中三日斬於市函其首歷示所害之地萬姓  
稱快

寓圃雜記

都察院爲以男裝女魘魅行姦異常事該直隸真定府  
晉州奏犯人桑冲供係山西太原府石州李家灣文水  
東都軍籍李大剛侄自幼賣與榆次縣人桑茂爲義男  
成化元年訪得夫同府山陰縣已故民人谷才以男裝  
女隨處教人女子生活暗行姦宿一十八年冲要得倣  
倣到大同南關住人王長家尋見谷才投拜爲師將眉  
臉紋刺粧作婦人身首就彼學會女王相謝回家比有  
本縣北家山任茂張虎谷城縣張端大馬站村王大喜  
文水縣任昉孫成孫原前來見冲學會前情冲各各誓  
盟散去成化三年三月內冲離家到今十月別無生理



專一在外圖姦經歷大同平陽太原真定保定順德順  
天河澗濟南東昌等府朔州永年大谷等共四十五府  
州縣及鄉村鎮店七十八處設計假粧逃走乞飯婦人  
先到旁住貧小人家投作工一二日使其傳說引進教  
作女工遇晚同歇誑言作戲又或合成迷藥默念昏迷  
呪使其女子手足不動口不能言或住三朝五日恐人  
識出又行那移別處一向不曾事發成化十三年七月  
十三日酉時分前到真定府晉州地名聶村生員高宣  
家詐稱是趙州民人張林妾爲夫打罵逃走前來投宿  
比被覺察將冲捉送晉州審供前情是實叅照本犯立

心異人有類十惡律無該載除將本犯并姦宿良家女子姓名開單連入牢固押法司收問外乞勅法司將本犯問擬重罪等因具奏奉聖旨都察院看了來說欽此欽遵臣等看得桑冲所犯死有餘辜其所供任茂等俱各習學前術四散姦淫欲將桑冲問擬死罪仍將各處巡按御史挨拏任茂等解京一體問罪以警將來及前項婦女俱被桑冲以術迷亂其姦非出本心又于礙人衆亦合免其查究成化十二年十一月二十日掌院事太子少保兼左都御史王等具題二十二日於奉天門奏奉聖旨這廝情犯醜惡有傷風化便凌遲了不必覆

奏任茂等七名務要上緊挨究得獲解來欽此

續已編

南京華嚴寺僧遊食貴州聞此中夷俗有人能變鬼法或男子或婦人變形爲羊豕驢騾之類啣人至死吮其血食之宣慰土官法禁而不能絕人戒僧云臥時喜防之僧與數人宿寺中夜深時聞羊鳴戶外少頃一羊入室就睡者身連襲之僧念曰得非向人所云乎卽運禪杖力擊其腰下一羊踣地遂復本形乃一裸體婦人執而繫之將以聞官婦人哀叫不已天明倩人往報其家人家人齊來寺中羅拜求免出白金三百兩爲僧贖婦命僧受之乃釋婦使去他日僧出郊見土官導從布野方

執人生瘞問傍觀者云亦捉得變鬼人也

說海

河南開封府有丹客之婦懷娠甚巨動躍間略似雙胎丹客語婦曰若生二男當名虎四虎五一日欲出天若雨狀謂妻曰晴履可耶抑雨具去可耶妻未答則腹中朗應無雨丹客驚問之曰虎四也言未竟又聞有應聲則曰虎五也自後凡有言無不驗一日謂丹客曰汝所爲竟煉不成必須爐如何置火如何候藥如何辦又曰如何如何乃毛也如何小點化如何大點化待吾母爲之可也丹客如言行之火然硫黃偶客至門室旣不深廣而客又不行其婦與二兒俱曰黃氣逼人奈何奈何

至夜薰蒸死世今有小點化之術謂其傳也或者天怒其泄故欲滅其口耶然亦不知何怪

俞文豹吹劍錄凡丙午丁未年中國遇之必災故宋時有術士上丙午丁未龜鑑謂自秦昭襄五十二年迄五代凡二十一次其年皆不靖宋南渡丁未高宗渡江淳熙丁未高宗上仙獨淳祐丁未則無他異惟自夏迄冬不雨所在湖陂河井枯竭蓋丙午丁未在天之中丙丁屬火皆在丙午旺鄉五行中惟水火不宜旺旺則不可救藥非有興王盛德未易當也故大撓作甲子於丙午丁未爲天河水以水能制火也戊午己未爲天上火以

戊巳土蓋其上則火不能熾也他不暇引宋以丙午丁未而无代之元以丙午丁未而我太祖興焉故有丙午丁未而天下或無大故者未有大故而不值丙午丁未者也天行之數亦可畏哉

李氏挺耀

第九十七卷

錄異部四

物異

火鼠雪蛆

藥獸

化蛇

化雉

老狐

變胡狀

屏上美人

木偶

喉間魚

宅鬼

雌雄雞

驅虎說

卷九十七目錄終

劉氏鴻書卷之九十七

明 宣城劉仲達 纂輯

錄異部 四

太史湯賓尹 刪正

物異

世間萬物無不生虫木水土之中生虫至多固其常也  
至於火中生虫則火鼠也極南方有之其毛以爲火浣  
布而火南雞亦食火也陰山以北積雪歷世不消其中  
生蛆其大如瓠北人謂之雪蛆味極甘美張子和醫者  
著儒門事親書言見民家一鐵鍋底上起一鐵泡鎚破  
有一紅虫其走如飛其嘴至硬是金鐵中亦有虫也

草



神農時白民進藥獸人有疾病則拊其獸授之語語如  
白民所傳不知何語語已獸輒如野外啣一草歸搗汁  
服之即愈後黃帝命風后紀其何草起何疾久之如方  
悉驗古傳黃帝嘗百草非也故虞卿曰黃帝師藥獸而  
知醫

芸窓私志

顏淵子路共坐於夫子之門有鬼魅求見孔子其目若  
日其形甚偉子路失魄口噤不能言顏淵乃杖劍前斫  
其腰於是形化爲蛇即斬之孔子出觀嘆曰勇者不懼  
智者不感仁者有勇勇者不必有仁

勝芸小說

陳倉秦穆公時人掘地得一物似猪羊形牽以獻公道逢二童子曰此媼也在地食人腦欲殺之先以栢木挿首媼曰此童子曰陳寶得雄則王得雌則霸倉舍媼逐童子化爲雉入林中言於公公大獵得其雌化爲石置汧渭之間作陳寶祠

史記

張華字茂先晉惠帝時爲司空於時燕昭王墓前有一班狐積年能爲變幻乃變作一書生欲詣張公過問墓前華表曰以我才貌可得見張司空否華表曰子之妙解無爲不可但張公智度恐難籠絡出必遇辱殆不得返非但喪子千歲之質亦當深誤老表狐不從乃持刺

謁華華見其總角風流潔白如玉舉動容止顧盼生姿  
惟重之於是論及文章辨校聲實華未嘗聞比復商略  
三史探賸百家談老莊之奧區披風雅之絕旨包十聖  
貫三才箴八儒撻五禮華無不應聲屈滯乃嘆曰天下  
豈有此年少若非鬼魅則是狐狸乃掃榻延留留人防  
護此生乃曰明公當尊賢容衆加善而矜不能柰何憎  
人學問墨子兼愛其若是耶言卒便求退華已使人防  
門不得出旣而又謂華曰公門置甲兵欄騎當是致疑  
於僕也將恐天下之人捲舌而不言智謀之士望門而  
不進深爲明公惜之華不應但使人防禦甚嚴時豐城

令雷煥字孔章博物士也來訪華華以書生白之孔章  
曰若疑之何不呼獵犬試之乃命犬以試竟無憚色狐  
曰我天生才智反以爲妖以犬試我其能爲患乎華益  
怒曰此必真妖也聞魑魅忌狗所別者數百年物耳千  
年老精不能復別惟得千年枯木照之則形立見孔章  
曰千年神木何由可得華曰世傳燕昭王墓前華表木  
已經千年乃遣人伐華表使人欲至木所忽空中有一  
青衣小兒來問使曰君何來也使曰張司空有一年少  
來謁多才巧辭疑是妖魅使我來取華表照之青衣曰  
老狐不智不聽我言今日禍已及我其可逃乎乃發聲

而泣條然不見使乃伐其木血流便將木歸燃之以照書生乃一班狐華曰此二物不值我千年不可復得乃烹之

搜神記

石季龍造大武殿初成圖畫自古賢聖忠臣孝子烈士貞女皆變爲胡狀旬餘頭悉縮入肩巾惟冠髻髣髴微出季龍大惡之秘而不言

五代史

楊太真得水晶屏上刻美人形可二三寸妃以遺國忠置之樓上常偃息其下一日國忠獨卧屏上諸女悉下各通名曰當壚人也步蓮人也桃源人也拾翠人也竊香人也金屋人也解佩人也爲雲人也画眉人也吹簫

人也笑嬖人也許飛瓊也趙飛燕也金谷人也結綺臨  
春人也國忠驚叱皆復歸屏自是不登樓未幾果敗楊妃

外傳

武德中曹惠爲江州參軍官舍佛堂中有二木偶人長  
尺餘工飾甚巧因持歸與稚兒戲稚兒食木偶引手請  
之惠問曰爾何時物頗能作恠曰輕素與輕紅是宣城  
謝太守家備偶且曰廬山神要索輕素等爲舞姬久矣  
請命畫工賜以粉黛惠令工人爲飾之輕素笑曰此度  
非論舞妓亦當爲彼夫人矣幽怪錄

唐末徽中絳州一僧病噎不下食數年臨終命其徒曰

吾死後可開吾胸喉視有何物苦我如此及死其徒依  
命開視胸中得一物形似魚而有兩頭遍體悉有骨鱗  
安鉢中跳躍不已戲投諸味雖不見食皆化爲水又投  
諸毒物亦皆消化一僧方作藍澱因以少澱投之即怖  
懼奔走須臾化成水

本草綱目

邢太尉孝揚初南渡寓家湖州德清驛湫隘不足容謀  
居於臨安甚切得薦橋門內王瓊太尉宅纔爲錢三千  
緡或曰都城中如此第舍當直五萬緡今不能什一亦  
知其說乎是宅久爲妖厲所據人不復堪處故以相付  
耳邢之內子及姑慶國夫人者皆倡言不可用邢患之

稍稍語內子曰人言是否固未定我將先驗之然我或云無汝終不以爲信蓋擇謹厚二婢子偕行庶可證其實遂往凡留半月中外輿倅無不臨履夜寢於正堂寂無一佈歸家具言且力詆前妄二妾亦深贊屋廬之美始盡室徙之徙之日物恠卽見家人閨幃間密語輒應於屋上嬉侮譚藝無所間斷主盡惑姬妾恬不避人於是盡悔其來時宋安國在德清亟遣招致爲作法考擇獲一鬼械而囚諸北陰已復一鬼出又捕治之俄復然鬼自述兄第四人又有他宗從眷屬并同儕極多宋施術已窮亦厭倦乃告邢氏曰茲地經兵虜之變殺人無



數今日何勝治不若建黃錄大醮拯拔之吾當爲主行  
使超然受生不與鬼爲怨府亦上計也邢如其戒揭錢  
二百萬辦醮筵鍊之夕置瓮架上幕以布悉召滯鳬集  
于中宋約邢親昇至前罄力不能舉但覺瓮內索索如  
蟹行聲訖事用八健卒負出門皆云壓肩上甚重各若  
荷百斤耳座之竹園深坎下宅至今平寧

異聞錄

元至正甲午乙未年龍泉縣人家有一雞二形一邊毛  
羽純雄一邊毛羽純雌既能雄鳴又解雌伏蓋氣之乖  
亂羽虫之孽也次年青田山賊陷縣治

草木子

陝西九驢山石昭陵在焉醴泉民逐白兔失足隧道中

頗黯黑油缸十數皆設關捩流注最下一缸中礮油不下火熒熒欲滅民爲通之向兎在傍乃銀鑄者上有刻字云換燈人賜銀兎一個四視珠貝懷出路迷便舍之乃復有門及攜兎出隧門隨閉

續已編

余里素無虎十數年偶有至者一宿信宿輒去未聞秋毫犯今二虎入地方匿余後山且旬日矣傷豚者再晝伏夜遊無去志或曰張何氏之網羅或曰挾伍氏之弩矢第念二虎未肆毒亦不幸落此畜道余正躊躇會客過余曰豺狼當道子不難請之君以安天下虎豹在山子豈難請之神以靖里中余中慚弗德逡巡不敢任于

是退而擊牲焚香禱於土社各神爲說以告之其異曰  
人有人居虎有虎穴百里外崇山峻嶺人所不到可穴  
處者何限妖禽惡獸人所不禁可攫食者何限何故罹  
此危地耶余思人畏虎不殺虎不可虎畏人亦避人其  
可哉人不能喻虎而托喻于神虎不知聽人而求聽于  
神神其洋洋如在濯濯厥靈以余不欲殺虎之意以衆  
必欲殺虎之勢陰馴二虎逐即離山尋穴于崇山峻嶺  
尋食于妖禽惡獸令虎不傷人人不傷虎豈不亦一功  
德乎哉或虎奉天遣余及地方衆生果不忠不孝不仁  
不讓欺賤殘貧暴寡凌弱種種作孽罪在難赦者即攝

其魂魄擊以雷霆何施弗可而令虎驚良善反於罪人  
無所警也神爲地方保障世享報祈余姑待命三日倘  
不能以弗德之人致虎北渡豈無馮婦周處張網羅操  
努矢食其肉而寢處其皮虎將無辭于神乎時未方焚  
告而申之時已報虎掉尾去矣此亦何異於渡河而尚  
俟夫埋輪者耶嗚呼神哉

朱吾弼驅虎說

劉氏鴻書卷九十七終